

VISCHNAUNCA D'ANDIAST



REGULATIV DAVART

LAS SEPULTURAS

ED IL SANTERI

Cuntegn:**I. Organisaziun, menaschi e survegionza**

- Art. 1 Survegionza ed execuziun
Art. 2 Pensums

II. Regulativ davart las sepulturas

- Art. 3 Metter el vischi
Art. 4 Transport da baras
Art. 5 Liug da satrar
Art. 6 Lubientscha da satrar
Art. 7 Preparaziuns per satrar
Art. 8 Cuosts da satrar
Art. 9 Tuccar da miert e da sepultura

III. Regulativ davart il santeri

- Art. 10 Proprietad
Art. 11 Intent
Art. 12 Procura dalla vischnaunca
Art. 13 Register da fossas
Art. 14 Uorden dallas fossas
Art. 15 Dimensiun dallas fossas
Art. 16 Occupaziun dallas fossas
Art. 17 Temps da ruaus
Art. 18 Exhumaziun
Art. 19 Sligiar si fossas
Art. 20 Allontanaziun
Art. 21 Qualitad dils vischals
Art. 22 Ramas, segns fossa
Art. 23 Manteniment dalla fossa
Art. 24 Encarden d'urnas
Art. 25 Schurmetg dil santeri
Art. 26 Prescripziuns subordinadas

IV. Determinaziuns finalas e penalas

- Art. 27 Determinaziuns finalas
Art. 28 Vigur

Sebasond sigl art. 12 dalla lescha davart l'igiene publica dil cantun Grischun dils 2 da decemeber 1984 statuescha la vischnaunca d'Andiast il suandont regulativ davart las sepulturas ed il santeri:

I. Organisaziun, menaschi e survegionza

Art. 1

Survegionza ed
execuziun

La survegionza sur dil regulativ davart las sepulturas ed il santeri ei adossada alla suprastanza communal. Ella ei responsabla per l'execuziun da tal.

Art. 2

Pensums

La suprastanza communal ha en special ils suandonts pensums:

- a) Relaschar las ordinaziuns pil diever e manteniment dils santeris.
- b) Survegionza sur la construcziun dils monuments e dallas ramas.
- c) Conceder la lubientscha e dar la disposiziun da rumir ed allontanar la fossa, suenter ch'il temps da ruaus ei spiraus.
- d) Conceder lubientschas extraordinarias per satrar baras da jasters.
- e) Nominar e survegilar il persunal necessari per igl uorden da santeri.
- f) Controllar il register da fossas.

II. Regulativ davart las sepulturas

Art. 3

Metter el vischi

Il miert astga vegnir mess el vischi pér cura ch'in miedi, engaschus en survetsch en Svizra, ha constatau la mort da tal. Sto ei, muort motivs medicinalis ni muort in savanzau process da smarschir dalla bara, buca vegnir ordinau da serrar il vischi pli baul, astga quel star aviarts tochen cuort avon la sepultura. Per metter el vischi baras cun prighel da contagiusedad, ein las prescripziuns federalas cumpetentas e decisivas.

Art. 4

Transport da baras

Transportar las baras ei caussa dils parents. Las prescripziuns specialas da confederaziun e cantun ein resalvadas.

Art. 5

Liug da satrar

Tuts morts sin intschess communal sco era tuttas baras, anfladas sin territori dalla vischnaunca d'Andiast, astgan vegnir satradas sin il santeri da nossa vischnaunca. Negin sa muort motivs da cardientscha ed outra natira vegnir sclaus d'ina sepultura undreivla sin il santeri da nossa vischnaunca. La sepultura sa haver liug sil pli baul 48 uras suenter la mort. En cass specialas sa il miedi districtual dar lubientschas excepziunalas.

Sin giavisch dil miert ni da ses parents sa la sepultura, cun lubientscha dalla suprastonza communal da leu, era haver liug en in auter santeri public.

Art. 6

Lubientscha da satrar Persunas ch'ei buca stadas sesentas en vischnaunca, buca mortas en vischnaunca ed era buca anfladas mortas sin territori da vischnaunca, astgan vegnir satradas el santeri da vischnaunca mo cun ina lubientscha speciala dalla suprastonza communal d'Andiast.

Art. 7

Preparaziuns per satrar La canzlia communal ordinescha il cavar la fossa e preparar tier quella ed en cass specials, sco per exempel per baras anfladas sin territori da vischnaunca, per las qualas igl ei buca pusseivel d'eruir ils parents e responsabels, prepara ella tuttas mesiras necessarias per la sepultura.

Art. 8

Cuosts da satrar Per cuvierer las spesas da cavar e cuvierer la fossa vegn adossau alla famiglia, respectiv als artavels, ina comensurada taxa. Tala ei prescretta egl uorden da taxas, approbaus dalla radunonza communal ed aschuntaus a quest regulativ davart las sepulturas ed il santeri.

Art. 9

Tuccar da miert e da sepultura Il cuoz e la dimensiun dil tuchiez da sepultura sedrezza suenter il reglament da tuccar ni igl usit dalla pleiv.

III. Regulativ davart il santeri

Art. 10

Proprietad Il terren dil santeri entuorn baselgia ei proprietad dalla fundaziun eccl. s. Gialetta.

Art. 11

Intent Il santeri ei per nus tratsch benediu e survescha al davos ruaus terester da nos defuncts. Pietad ed engrazieivladad enviers els pretendan da tuts vischins da salvar el en duida honor e da tener el bein en uorden.

Art. 12

Procura dalla vischnaunca	Alla vischnaunca ei surdada la procura da: <ul style="list-style-type: none">- Erecziun, engrondaziun e reparaturas- Indrezs da cavar fossa e da satrar- Cavar fossa e cuvierer
---------------------------	-----------------------------------------------------------------------------------------------------------------------------------------------------------------------------------------------------------------

Art. 13

Register da fossas	L'administraziun communal meina in plan dall'occuppaziun dil santeri, el qual il num, prenum, gi da naschientscha e gi da mort e tuts satrai ein dad impurtar continuadamein. Quei register dils morts ei da controllar dalla suprastanza communal.
--------------------	-----------------------------------------------------------------------------------------------------------------------------------------------------------------------------------------------------------------------------------------------------

Art. 14

Uorden dallas fossas	L'ordinaziun dalla successiun dallas fossas da retscha sedrezza suenter il plan relaschus dalla suprastanza communal. En las fossas da retscha vegnan ils morts satrai en successiun continuonta. Fossas da famiglia dat ei buca el santeri dalla vischnaunca d'Andiast.
----------------------	--------------------------------------------------------------------------------------------------------------------------------------------------------------------------------------------------------------------------------------------------------------------------

Art. 15

Dimensiun dallas fossas	La distanza denter las singulas fossas da retscha ha da cumportar sil pli pauc 50 cm. Las fossas ein da cavar cun ina profunditad minimala da 150 cm.
-------------------------	-------------------------------------------------------------------------------------------------------------------------------------------------------

Art. 16

Occuppaziun dallas fossas	Scadin vischi ei da satrar en ina fossa dapersei. Sin giavisch dil trapassau ni dils parents san urnas era vegnidas satradas en ina fossa gia existenta en ina profunditad da 80 cm. Cheutras vegn il temps da ruaus primar buca prolunghius.
---------------------------	-----------------------------------------------------------------------------------------------------------------------------------------------------------------------------------------------------------------------------------------------

Art. 17

Temps da ruaus	Il temps da ruaus per tuttas fossas munta a 20 onns. Eventualas restonzas d'ossa ni dad urnas che vegnan neunavon enten cavar las fossas suenter il temps da ruaus prescret ston vegnir satradas da buna maniera.
----------------	-------------------------------------------------------------------------------------------------------------------------------------------------------------------------------------------------------------------

Art. 18

Exhumaziun Igl ei scumandau d'exhumar ina bara avon ch'il temps prescret ei spiraus. Sin fundament d'ina damonda motivada dalla vischnaunca ni dils parents, sa il departement da sanitad conceder ina lubientscha excepziunala. Exhumaziuns da defuncts satrai stattan sut survegionza dil miedi districtual, che pren las disposiziuns necessarias a risguard la polizia da sanitad.

Art. 19

Sligiar si fossas Suenten il temps da ruaus da 20 onns sa la suprastonza, tenor basegns per novas fossas, ordinar da sligiar si parts dil santeri. Vul ella far quei ei ella obligada da publicar quei ufficialmein e comunicar als vegnent-suenten il termin dall'allontanaziun e quei sil pli pauc 3 meins avon.

Art. 20

Allontanaziun Succeda quell'allontanaziun buca enteifer il temps fixau, sa la suprastonza communal schar exequir quella lavur tras tiarzas personas ed ils cuosts per quell'allontanaziun e lavur vegnan mess a quen als parents. Sur monuments e ramas che vegnan buca allontanai enteifer il temps fixau dispona la suprastonza communal.

Art. 21

Qualitad dils vischals Il vischi ha dad esser ord in lenn dalla sort lomma. Ei la bara ultra dil vischi aunc enserrada en ina teigia da plastic ni en ina cuvrida da metall, ston quellas vegnir perfurradas avon che la fossa vegni cuvretga, per che la bara survegni aunc aria, per aschia smarschir.

Art. 22

Ramas, segns fossa Mintga fossa sto vegnir enramada cun ina rama da crap ni da betun. Las ramas duein haver ina mesira da 60 sin 160 cm. Ei sto vegnir tschentau ina crusch sin las fossas. Las cruschs-fossa ston esser da lenn ni da fier zincau e patinau. Cruschs da ghisa ein buc lubidas. Las cruschs astgan haver las suondontas dimensiuns:

- altezia inclusiv postament	1.00 m – 1.20 m
- ladezia maximala	0.50 m

Mintga crusch-fossa duei purtar num, prenum, onn da naschientscha ed onn dalla mort dil defunct.

Il terren ordeifer la rama, astga buca vegnir surplantaus.

Las ramas e cruschs astgan vegnir eregidas sil pli baul 6 meins suenter la sepultura. Il material restont sto vegnir allontanaus immediatamein da quels ch'exequeschan la lavur, sinaquei ch'il santeri resti schubers. Monuments e ramas da fossas cavadas si ein d'allontanar ord santeri entras ils parents.

Art. 23

Manteniment dalla fossa

Tgi che posseda fossas ei obligaus da mantener quellas en bien stan. Duess in ni l'auter tralasar il manteniment sa la suprastanza communal surdar la lavur da remadura ad ina tiarza persuna cun suttametter ils cuosts als parents ch'ei obligai pil manteniment dalla fossa. Il plantar plontas e cagliom sin las fossas ei scumandau, aschigleiti che quellas plontas han disavantatg e consequenza sil contuorn. Mintgin che rugalescha fossas duei dismetter ils curdems el liug destinau e mess a disposiziun tras la vischnaunca, la quala procura la dismessa da leu. Tschuppials, dils quals ins vul vinavon far diever, ein da prender a casa. La tgira dalla fossa senza parents procura la vischnaunca entras surdar l'incarica ad ina tiarza persuna, che vegn indemnisada persunter, aschinavon sco igl ei pusseivel ord il relasch dil defunct. Per garantir il manteniment dad ina fossa senza parents durent il temps da ruaus, dat ei era la pusseivladad dad arver in fondo (conto bancar) cun surdar ina plenipotenza alla canzlia communal. Il manteniment digl ulteriur terren da santeri ei surschaus alla vischnaunca.

Art. 24

Encarden d'urnas

Las urnas vegnan deponidas sisum da seniester a dretg ed aschia vinavon. Sin giavisch dil trapassau ni dils parents san urnas era vegnidas deponidas en in caum gia occupaus. Cheutras vegn il temps da ruaus primar buc prolunghius. Il temps da ruaus per tuttas urnas munta a 15 onns. Il crap davon mintg'encarden d'urna vegn mess a disposiziun dalla vischnaunca. El duei purtar num, prenum, onn da naschientscha ed onn da mort dil defunct en scartira unica. Ils cuost per l'inscripziun vegnan surpi dils parents.

Art. 25

Schurmetg dil santeri

Il visitar il santeri e siu terren ei lubiu a scadin. Scumandau ei en special:

- In sedepurtar disturbond e da canera sigl areal dil santeri
- Donnegar ni tartignar fossas sco era igl ulteriur terren da santeri
- Encurir ni allontanar plontas e fluras senza dretg
- Visitar il santeri en accumpignament da tgauns

Art. 26

Prescripziuns subor- Per tuts cass buca stipulai en quest regulativ valan las prescripziuns
dinadas cantunalas e federalas.

IV. Determinaziuns finalas e penalas**Art. 27**

Determinaziuns Contravenziuns dil present regulativ davart las sepulturas ed il santeri
penalas vegnan punidas dalla suprastanza communal cun castitgs ell'altezia da
frs. 50.-- entochen frs. 500.--. L'execuziun dalla disposiziun da castitg sin
cuost dil culpont sco la premessa al derschader resta resalvada.
La procedura sedrezza tenor las determinaziuns cantunalas ed il proceder
da castitg dallas instanzas administrativas.

Art. 28

Vigur Il present regulativ davart las sepulturas ed il santeri va en vigur cun
l'approbaziun dalla radunonza communal.

Approbaus dalla radunonza communal dils 7 d'october 2005.

En num dalla radunonza communal:

Il president:

Igl actuar:

Lucas Sgier

Giovanni Damiano

UORDEN DA TAXAS TIER IL REGULATIV DAVART LAS SEPULTURAS ED IL SANTERI DALLA VISCHNAUNCA DA ANDIAST

	Per morts cun davos domicil en vischnaunca	Per morts cun davos domicil ordeifer la vischnaunca
a) Fossa da retscha	negins cuosts	frs. 600.--
b) Fossa dad urna en fossa veglia da retscha	negins cuosts	frs. 300.--
c) Encarden d'urna	frs. 500.--	frs. 1'000.--
d) Encarden d'urna en caum gia occupaus	frs. 250.--	frs. 500.--
e) Exhumaziun	tenor cuosts	tenor cuosts

Remarca Prestaziuns dalla pleiv ein buca incumpridas.

Approbau dalla radunonza communal dils 7 d'october 2005.

En num dalla radunonza communal:

Il president:

Igl actuar:

Lucas Sgier

Giovanni Damiano